

Naalakkersuisut kingusinnerpaamik UKA 2017-imi siunnersuummik savaateqarfinnik tunisinerni tunniussinerniluunniit savaatillit akiitsuinik tamakkiisumik ilaannakortumilluunniit isumakkeerinnissinnaalernermik pisinnaalersitsisumik saqqummiussinissaat pillugu Inatsisartuni aalajangiiffigisassatut siunnersuut.

(Inatsisartunut ilaasorta q Aqqaluaq B. Egede, Inuit Ataqatigiit)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera.

Siullermik Naalakkersuisut sinnerlugit siunnersuuteqartumut siunnersuuteqarneranut qutsavigissavara. Naalakkersuisut qaqugumilluunniit inuussutissarsiortut inuussutissarsiutaasa pitsaasuunissaat pillugit suliniuteqartuarput taamaattumillu, suliniutit inuussutissarsiuteqartunut ESU-p periarfissiineranut atasunut pitsannorsaataasinnaasut aallartinnikuullugit.

Nunalerineq pillugu Ataatsimiititaliarsuup isumaliutissiissunni 2014-mi naammassivaa, tamannalu 2015-imi Naalakkersuisunut Inatsisartunullu saqqummiunneqarluni. Isumaliutissiissummi ilaatigut inassuteqaataapput suliniutinik savaatillit akiitsuinut tunngasut aallartinneqassasut, savaateqartut inuuniarnikkut atugaasa ajornannginnerusumik ingerlalnissaanut aqutissiuisussatut.

Nunalerineq pillugu Ataatsimiititaliarsuup inassuteqaataanut sulinissamut atatillugu Naalakkersuisut ESU pillugu nalunaarusiortitsippot, kiisalu aningaasaliissutit inuiaqatigiinnut aningaasatigut kingunerisassa at pillugu nalunaarusiortitsineq. Taakkulu 2016-imi upernaakkut Inatsisartut ataatsimiititaliaannut saqqummiunneqarput.

Suliarineqartut qulaani taaneqartut aallaavigalugit Naalakkersuisut suliassat aallartippaat, ilaatigut tamakkiisumik ilaannakortumilluunniit akiitsuinik isumakkeerinnissinnaanissamut inatsisunik allannguinnissaq siunertaralugu, ullumikkut inatsisit atuuttut malillugit imaaliallaannaq akiitsuinik tamakkiisumik ilaannakortumilluunniit isumakkeerinnittoqarsinnaanngimmat. Sulinermi naatsorsuutigineqarpoq Namminersorlutik Oqartussat iluanni oqartussaasut allat soorlu Akileraarternermut Aqutsisoqarfik, taassumalu ataani Akiliisitsiniartarfik kallarneqassasut. Taamaattumik sulinissaq piareersarluarneqarsimasoq pisariaqartinneqarpoq.

Suliaq akiitsuinut tunngasoq savaatilinnuunnaq tunnganngilaq, tassami ESU-mi akiitsuulersimasut aalisartunut aamma tunngasut tassani suliarineqartussaammata.

Suliap ingerlannerani pisariaqassaaq ESU-mut suliat ataasiakkaat akiitsuinik isumakkeerinnittoqassagaluarpat eqqarsaatigineqartariaqartoq naapertuutiinnannginnersoq inuussutissarsiutip qimaannarnissaa, imaluunniit allanit tiguneqarnissaa siunertaralugu inuussutissarsiutip kattussimasunut aningaasaqarniarnikkut aqutsinermi imminut nammassinnaasunut katersornissaa. Ataasiakkaat akiitsuinik isumakkeerinninneq akiitsuinillu nutaanik pilersitseqqinneq inuussutissarsiummut siunissaqartitsinnigilaq.

Malugeqquneqassaaq akiitsuinik isumakkeerinninneq imaluunniit annikillisaaneq ESU-mi atorniarsimasumut akileraaruteqarnermik kinguneqartussaammat.

Inuussutissarsiuteqarnermut politikikkut tamatigoortumik anguniagaavoq, inuussutissarsiornermi immikkoortukkuutaat namminersortut tungaanniit annertusaanermut suliffissaqartitsinermullu tunniussaqaarnissaat aammalu tapiissutaasinnaasut piffissatigut killiligaasimassasut.

Tungaviatigut Naalackersuisut siunnersuut taparserpaat, taamaattorli Naalackersuisut qulaani taaneqartut inatsisinik nutarsaanissaq suliarineqartut UKA 2017-imi ESU-mi tamarmiusumik akiitsuulersimasunut tunngasumik saqqummiussinissartik siunniunkuummassuk, siunnersuutip itigartinneqaarnissaa inassutigaa.

Taamatut oqaaseqarlunga Inatsisartunut ilaasortanut oqallinnissaq ingerlateqqippara.